

欽定剿平三省邪匪方略

正編

十六

卷之三 石地四景

五

六

欽定剿平三省邪匪方略正編卷二十九

丁巳年

二月十五日

丙戌

惠齡恒瑞慶成舒亮奏言前次

差探東北一路逃匪經阿爾薩朗訥音分投跟

剿茲據阿爾薩朗等報稱賊匪由洛陽店均川

一帶逃竄一面知會明泰帶兵迎往官潭阿爾

薩朗等卽統兵由洛陽店一帶進剿及到均川

賊已先期遁去隨卽趕至官潭賊匪經明泰剿

向北竄並據明泰稟稱該總兵行至官潭天色
已晚正欲紮營賊匪忽從山後蜂擁而來公然
撲犯明泰隨令馬兵抄截衝散賊匪分爲兩截
左右圍裹明泰督率叅將馬爲錦遊擊朱廷進
亦將兵分爲兩翼迎頭擊剿賊匪愍不畏死悉
力抗禦黑夜之中互相攪殺明泰左腿受有矛
傷二處官兵人人憤恨奮力向前殺死多賊餘

匪始四散潰逃該處山路甚雜時已昏夜不便

窮追卽於該處紮營臣等查東北一路山勢綿

延與河南之桐栢等縣連界臣等已飛飭楚豫

兩省邊界州縣嚴加防堵茲復馳檄各該處加

緊嚴截並知會景安一體飭備以免闌入一面

飛札阿爾薩朗訥音及叅將馬爲錦烏爾卿額

候補知府鄭成基同知周李堂等將此敗竄之

賊分投截剿並於各要隘密行佈置晝夜巡防

勿使逃逸又據應山安陸等縣具報大兵節次

剿散餘匪或二三百人或一二百人及數十人

不等間由山僻小路潛逃入境一經鄉兵截拏

賊匪卽分路逃散此等潰匪因被官兵追殺不

暇與賊首姚之富等會爲一處是以紛紛散竄

冀延旦夕更恐分路牽掣官兵致令首逆乘機

遠竄若必處處分撥官兵愈分愈單惟有探明
姚之富等實在去向上緊擒獲則餘匪不難次
第埽除適差探回報姚之富等現由大洪山左

近奔逃

臣

等公同商酌

臣

恒瑞慶成同碩雲謀

六十七分帶馬隊繞至賊前攔截並令總兵富

成帶兵伏於路側

臣

惠齡舒亮等帶領官兵由

長岡嶺一帶進剿行至三里岡探聞小阜街有

賊匪千餘人屯聚臣舒亮帶領馬兵繞至前面

迎頭剿捕臣惠齡等從後掩襲將抵小阜街果

見賊匪各持器械紛紛行走猝見官兵不及逃

竄各拚命抗拒我兵排鎗擊打殺死多人山東

遊擊默爾根射死執旗賊目一名衆兵生擒周

則仁等二十餘人臣恒瑞慶成已經繞至前面

賊匪見官兵四面驟至驚竄之餘盡捨命衝突

官兵鎗射箭射賊奔上山梁我兵復尋路繞上
爭先追捕殲斃五百餘人拿獲賊目李士英邱

添有等十七人其餘賊匪奔竄下山又遇富成

等伏兵齊起殺死無數生擒袁有裕等四十三

名隨提問周則仁等犯嚴訊均無要供當卽分

別寸磔梟示偵探賊人盡從西北一帶奔逃

臣

等所領各營馬隊最爲得力

臣

惠齡到營時查

看可以乘騎壯馬不過四五百匹今月餘以來
晝夜馳驟馬力不無勞乏經景安疊次協濟馬

三百餘匹

臣

惠齡復知會撫臣汪新在於楚省

購辦本地之馬陸續解營以資更換一面分派
馬隊將各賊設法兜圍驅歸一處以備官兵合
力痛殲

同日額勒登保德楞泰奏言查楚北襄陽教匪

於屢經剿殺之後尙敢四路奔竄前接惠齡等
咨會當將乾州鎮筰附近分駐之荊州滿兵一

千七百餘名及陸續撤出之綠營官兵二千餘

名令將軍與肇及副將劉廷基等分起由水路

前赴襄陽以資分派

臣

額勒登保卽行起程速

赴楚北如尙有應行添帶官兵之處俟路過乾
州再於廣東廣西兵丁內酌撤二三千名隨帶

前去以期得力至黃栢山一路已有勒保帶領
貴州之兵到彼與福寧會合足敷剿捕惟聞該
處山路亦極險峻恐尙須添兵力茲查有原駐
花園後路之宜昌施南等處官兵應行撤回者
約計尙有二千餘名現今宜昌鎮總兵張廷彥
帶回本處並知會福寧等如果需用卽可就近

酌調

臣

德楞泰遵

旨與明亮同赴達州協力剿辦所有川省官兵除前
派川北鎮朱射斗副將長春等帶回二千餘名
外現在苗疆尙有三千餘名已全數撤出卽日
統交提臣穆克登阿總兵達音泰等督率將領
分起行走並於原調之五寨屯兵內挑出五百
名兩金川降番內挑出一百名一併帶往其餘
病弱殘廢者悉行遣回以示體恤均奏入

上命軍機大臣傳諭惠齡額勒登保景安汪新曰此

次賊匪向官潭小阜街等處逃竄經惠齡等帶領

將弁官兵分投迎截雖殲斃賊匪五百餘人生擒

六十餘名尙不爲多且惠齡摺內祇稱東北一路

賊匪經阿爾薩朗明泰剿殺紛紛潰逃究竟逃往

何處摺內未據聲明又西北一路賊匪經惠齡由

小阜街掩襲摺內亦祇稱餘賊奔竄下山仍向西

北奔逸又究竟逃往何處亦未聲明東北一帶與
桐栢山相近固當防其竄入而西北卽係呂堰樊
城及豫省鄧州淅川等處尤不可不嚴密堵截景
安務與王文雄督率弁兵鄉勇於毗連楚省各要
隘加意巡防汪新現駐襄陽亦應一體迎堵截殺
使賊匪無路逃生不致再有勾結至額勒登保等
奏將荊州滿兵及綠營兵共三千七百餘名交與

肇及副將劉廷基帶領前赴襄陽著傳諭興肇加
緊趲行到襄助剿惠齡一路官兵剿捕已久未免
稍形疲乏今得此勝兵壁壘一新振作士氣更爲
得力總兵明泰打仗受傷現在曾否痊愈並著附
便覆奏至各營馬隊追賊最爲得力今旣間有疲
乏自應酌換業經景安協濟馬三百匹外著汪新
再於本地上緊購辦迅解軍營如楚省一時購辦

不及仍著景安於河南省酌量辦往協濟但賊匪俱係步行我兵騎用馬匹祇須足敷追捕之用亦不必過多致滋糜費賊人雖俱係本地匪徒熟悉路徑而惠齡等隨營鄉勇亦多係該處之人何難令其在前指引或繞至賊前或預行埋伏以便隨路剿殺惟在惠齡隨時調度勿得藉口賊人熟悉路徑稍稽剿捕